

Brief uit Dordrecht, 2 October 1577, van Charlotte de Bourbon aan den Prins.  
(Koninklijk Huisarchief)

Monseigneur i'arive ier en ceste ville sur ungne heure apres midy et vint avec le bateau jusques aupres du logis ou iay trouve nos petites filles en bonne sencte les grandes esperant vostre retour bien de bref non point voullu loger en vostre quartier il ont un bon logis mais il est un peu trop loings a mon gre il environ un quinze maisons entre deux la nostre demain vostre sirurgien commencera apencer monsr le conte Maurice nous portons tous bien grace a dieu et desirons fort que puissies bien tost revenir ceulx a quy iay parle de ceste ville mont dit que les estas de ce pais vous avoient deia prie de retourner et sy attende et leur sanble que vous pouves aussy bien donner conseil dicy que plus pres et plus seurement sy la paix est conclue avec don Joan ie ne scay monseigneur sy vous aures affaire dy seiourner plus longuement et puis monsieur vostre frere est absant de vous quy ne peut sans quy luy ennuie beaucoup nous desirerions bien fort quy fust pardessa sy vous plaisoit de luy escrire pour le prier de vous lesser le precepteur quy est aupres de monsr votre filx je serois bien de cest avis car ledit precepteur est en paine destre incertain de sa demeure et sera tout fache dequoy lon l'aura retenu sy ce n'est pour tour jours aussy faudroit il bien savoir l'entretènement qu'il vous plaira luy bailler je vous rons la teste monseigneur de beaucoup de petite chose mais il est besoing de savoir vostre voullonte je voudrois bien savoir sy vous aures remecie la roine dengleterre de tant de bons offices quelle faict faire par son enpasadeur quy est a bruxelle ce que pran la hardiesse de vous ramentevoir

A dordrect ce 2 octobre (1577)

Vostre treshumble et tresobeissante fame tant que vivera

C de Bourbon